

## CONVENIO DE COLABORACIÓN ENTRE A CONSELLERÍA DE EMPREGO, COMERCIO E EMIGRACIÓN E O CLÚSTER DA COMUNICACIÓN DE GALICIA PARA A PRESTACIÓN DE SERVIZOS DE MARKETING E COMUNICACIÓN Á COMUNIDADE EMPRENDEDORA, INTEGRADOS NO PROGRAMA ANUAL DE ACTIVIDADES DO CENTRO DE ORIENTACIÓN, EMPRENDEMENTO, ACOMPAÑAMENTO E INNOVACIÓN PARA O EMPREGO DA COMUNIDADE AUTÓNOMA GALICIA

### REUNIDOS

Dunha parte, José González Vázquez, conselleiro de Emprego, Comercio e Emigración, actuando en nome e representación da Xunta de Galicia, en virtude do *Decreto 44/2024, do 14 de abril, polo que se nomean os titulares das consellerías da Xunta de Galicia* (DOG núm. 73, do 14 de abril), no exercicio das facultades que lle confire o artigo 34 da *Lei 1/1983, do 22 de febreiro, de normas reguladoras da Xunta e da súa Presidencia*.

Doutra parte, Alberto Garnil Rodríguez, actuando en nome e representación do Clúster da Comunicación de Galicia, con NIF G70115282, en calidade de presidente do mesmo.

As dúas partes, que interveñen en función dos seus respectivos cargos e no exercicio das facultades que, para actuar en nome das entidades que representan, teñen conferidas,

### EXPOÑEN

1. A *Lei Orgánica 1/1981, do 6 de abril, do Estatuto de Autonomía para Galicia*, no seu artigo 29, atribúelle á Comunidade Autónoma, en concordancia co artigo 149.1.7 da *Constitución Española*, a competencia para a execución da lexislación do Estado en materia laboral, asumindo as facultades, funcións e servizos correspondentes a este ámbito.

De acordo co previsto no artigo 1 do *Decreto 147/2024, do 20 de maio, polo que se establece a estrutura orgánica da Consellería de Emprego, Comercio e Emigración* (DOG núm. 101, do 27 de maio), a esta Consellería lle corresponden, entre outras competencias, propor, deseñar,



coordinar e executar as directrices xerais do Goberno no ámbito laboral e do emprego, que engloba, entre outras, as competencias en materia de políticas activas de emprego, emprendemento, emprego autónomo, cooperativas e outras entidades de economía social, formación para o emprego, orientación e colocación, intermediación laboral, así como política laboral, relacións laborais, seguridade e saúde laboral e responsabilidade social empresarial.

Consonte o artigo 19 do dito Decreto 147/2024, como órgano superior da Consellería de Emprego, Comercio e Emigración, correspóndelle á Secretaría Xeral de Emprego e Relacións Laborais a dirección, coordinación, control e execución das competencias da Comunidade Autónoma en materia de apoio, fomento e mantemento do emprego, traballo autónomo, cooperativas e economía social, apoio á integración laboral das persoas con discapacidade ou en situación de vulnerabilidade e formación profesional para o emprego en toda a súa extensión; a dirección das competencias da Comunidade Autónoma en materia de emprendemento e a coordinación das atribuídas a outros órganos, así como a promoción de políticas públicas e programas que impulsen, promociónen e apoién a cultura emprendedora; a dirección e xestión das funcións atribuídas á Consellería en materia de fomento do emprego en colaboración coas administracións e institucións públicas e con entidades sen ánimo de lucro.

Tal e como establece o artigo 43 do Decreto 147/2024, a Dirección Xeral de Traballo Autónomo e Economía Social, como órgano de dirección directamente dependente da Secretaria Xeral de Emprego e Relacións Laborais, asumirá, entre outras funcións, as competencias de apoio ao emprendemento durante todas as fases da actividade emprendedora, tanto as actuacións necesarias para o comezo da actividade como a súa realización efectiva posterior, e incluírá a implementación e mantemento, con servizos de asesoramento, mentoría (mentoring), así como de apoio económico ou doutra índole, ao crecemento e o mantemento do emprego, e cantas funcións lle sexan atribuídas por parte da persoa titular da Secretaría Xeral e, en particular, a coordinación coas restantes direccións xerais da Consellería, así como cos outros centros directivos ou organismos da Comunidade Autónoma en todo canto se trate de actuacións vinculadas ao emprendemento, crecemento e mantemento de emprego. Na mesma liña, esta Dirección Xeral asume a colaboración e a coordinación das diferentes actuacións con outros axentes territoriais, organismos,



institucións públicas e privadas de ámbito nacional, autonómico e local vinculadas ou que realicen actividades de fomento ao emprendemento e apoio ao emprego. Polo tanto, con carácter xeral, encárgase de apoiar e promover calquera tipo de actividade que contribúa ao emprendemento en Galicia.

**2.** Nas sociedades avanzadas, constitúe un obxectivo prioritario da axenda pública o impulso de proxectos territoriais que faciliten a transformación produtiva, aborden o reto demográfico e promovan a creación de emprego que contribúa a fixar poboación, especialmente no ámbito rural e nos seus pequenos municipios, dinamizadores do desenvolvemento local sostible.

Por este motivo, a Xunta de Galicia ten como un dos seus principais obxectivos o impulso de medidas para fomentar o emprendemento e apoiar ás persoas emprendedoras como axentes dinamizadores da economía na Comunidade Autónoma, dada a súa contribución esencial á xeración de riqueza e emprego.

Desta aposta da Xunta polas iniciativas en materia de emprendemento resultou o recoñecemento de Galicia como Rexión Emprendedora Europea 2025, outorgado polo Comité Europeo das Rexións. Este premio implica un estímulo para avanzar nunha maior equidade territorial, no impulso de iniciativas emprendedoras na Galicia non urbana, na diversificación das actividades económicas que se desenvolven neste contorno e no fortalecemento da colaboración do ecosistema emprendedor.

A Consellería de Emprego, Comercio e Emigración vén despregando, dende o ano 2022 e por todo o territorio galego, a Rede de Polos de emprendemento e apoio ao emprego de Galicia, nos que se desenvolven actuacións de incubación de proxectos de emprendemento e formación dirixida a persoas emprendedoras, cun apoio personalizado para acompañar e impulsar proxectos, reforzando as oportunidades de mellora e tecendo no territorio unha rede de intercambio de coñecementos e experiencias, a través de sinerxías de colaboración e axuda mutua entre as persoas emprendedoras, que redunda no empoderamento, a valorización do rural, a innovación, a sostibilidade e o compromiso co territorio.

A devandita Rede está formada por quince polos de emprendemento e apoio ao emprego,



situados nos concellos de Coristanco, Ferrol, Melide, A Fonsagrada, Friol, Mondoñedo, Monforte de Lemos, Sarria, Baños de Molgas, O Barco de Valdeorras, O Carballiño, Verín, Porriño, Silleda e Vilanova de Arousa. A Dirección Xeral de Traballo Autónomo e Economía Social asume a xestión directa e indirecta e a coordinación da Rede de Polos de emprendemento e apoio ao emprego de Galicia.

**3.** O instrumento financeiro *NEXT GENERATION EU*, aprobado polo Consello Europeo o 21/07/2020, inclúe como elemento central o *Mecanismo de Recuperación e Resiliencia* (MRR), cuxa finalidade é apoiar o investimento e as reformas nos estados membros para lograr unha recuperación sostible e resiliente, fronte as consecuencias económicas e sociais derivadas da pandemia da Covid-19, permitindo levar a cabo reformas tanto a nivel nacional como en cogobernanza coas comunidades autónomas con competencias transferidas. O *Plan de Recuperación, Transformación e Resiliencia para España* (PRTR) acordado polo Consello de Ministros, foi aprobado pola Comisión Europea con data do 16/06/2021.

Dentro deste plan e, en concreto, na política de panca VIII, o Investimento 5 (obxectivo CID 347 de implantación da rede de centros públicos de orientación, emprendemento, acompañamento e innovación para o emprego) refírese á *Gobernanza e impulso ás políticas de apoio á activación para o emprego*, e se encadra na compoñente 23: *Novas políticas públicas para un mercado de traballo dinámico, resiliente e inclusivo*, no marco das reformas para impulsar as políticas activas de emprego. Así, co obxecto de dispoñer dun sistema de orientación, emprendemento, acompañamento e innovación para o emprego que actúe de forma coordinada no territorio nacional, asinouse un protocolo para a creación dunha Rede de Centros Públicos de Orientación, Emprendemento, Acompañamento e Innovación para o Emprego que se inclúe no proxecto C23.I05.P01 financiado con fondos *NEXT GENERATION EU*.

A finalidade desta rede de centros é a de servir de espazo para impulsar proxectos innovadores que reduzan o desemprego, fomenten a inserción laboral, o emprego de calidade e o apoio ás persoas emprendedoras e, en suma, contribúan a reforzar a colaboración entre o Estado e as comunidades autónomas nunha maior vinculación entre as súas políticas activas e de promoción ao emprego, prestando un servizo de acompañamento no ciclo vital dos proxectos empresariais. A rede de centros que instrumentaliza eses obxectivos (Rede COE) estará formada por un total de 20 centros: un centro por Comunidade



autónoma, un por Cidade autónoma e un de carácter estatal.

As actividades da Rede de COE se establecen no Programa Anual de Traballo (PAT) de cada un dos centros, no que se determina o alcance e as características dos traballos a desenvolver para dar resposta ás funcións asignadas no artigo 88 do *Real Decreto 818/2021, do 28 de setembro, polo que se regulan os programas comúns de activación para o emprego do Sistema Nacional de Emprego*, e entre as que destaca o deseño de modelos de emprendemento e aplicación de proxectos piloto (artigo 88.1, letra d).

Na proposta do Programa anual de Traballo do COE Galicia para o ano 2025 está incluída a acción COEGAL25d07 definida como *Programas de accións transversais e de capacitación en distintas ferramentas que favorezan a empregabilidade e a iniciativa emprendedora*, que agruparía unha serie de actividades orientadas a mellorar a busca de emprego e a promover e fornecer proxectos empresariais. Dentro destas actividades ten cabida a prestación de servizos de marketing e comunicación á comunidade emprendedora.

**4.** Pola súa parte, o Clúster da Comunicación de Galicia é unha organización de natureza asociativa e sen ánimo de lucro, entre cuxas finalidades atópanse as de apoiar, defender e representar os intereses do sector da comunicación en Galicia; poñer en valor as habilidades das empresas de comunicación; mellorar a competitividade das empresas socias a través da innovación, cooperación e mellora de capacidades; potenciar a visibilidade do sector da comunicación a través de medidas de promoción e difusión; así como colaborar con outras entidades, administracións e empresas na procura destes obxectivos.

Para a consecución destes fins, o Clúster da Comunicación de Galicia conta cun equipo directivo e persoal técnico especializado e con experiencia nos ámbitos da comunicación e do emprendemento, a través do que presta asesoramento e información para o desenvolvemento de proxectos e iniciativas no sector da comunicación, favorecendo a innovación e a competitividade. Tamén ofrece diversas posibilidades, como acollerse a proxectos que o Clúster desenvolve con distintas entidades públicas e privadas, participar na realización de proxectos de cooperación e formación con empresas pertencentes ao colectivo, participar en encontros comerciais, establecer contacto e intercambio de experiencias con outras persoas empresarias e emprendedoras, ou promover sinerxias



dentro do colectivo para o desenvolvemento e consolidación das empresas.

5. Á vista destes precedentes, en xullo de 2024 esta Consellería asinou un convenio co Clúster da Comunicación de Galicia para a prestación de servizos de marketing e comunicación dirixido á comunidade emprendedora. Esta experiencia previa, así como o éxito do devandito programa, acredita o especial coñecemento desta entidade nas actuacións que se pretenden levar a cabo en virtude do presente convenio.

6. O contexto actual de control do gasto público no ámbito da Administración conleva a adopción de medidas de xestión eficiente dos recursos dispoñibles.

No ámbito das políticas activas de emprego, a *Lei 3/2023, do 28 de febreiro, de Emprego*, no seu artigo 32, recolle a posibilidade de xestionar as accións e medidas de políticas activas de emprego, entre outras opcións, mediante a subscripción de convenios ou calquera outra forma xurídica axustada a dereito.

O artigo 19.4.a) da *Lei 9/2007, do 13 de xuño, de subvencións de Galicia* e, no mesmo senso, os artigos 36.a) e 37 do *Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia*, prevén a concesión directa de subvencións previstas nominativamente nos orzamentos xerais da comunidade autónoma. En base á mencionada normativa, este convenio co Clúster da Comunicación de Galicia atópase recollido nominativamente nos orzamentos xerais da Comunidade autónoma para 2025, aprobados pola *Lei 4/2024, do 27 de decembro, de orzamentos xerais da Comunidade Autónoma de Galicia para o ano 2025*.

Dado o carácter singular das actuacións que se van desenvolver en base a razóns de interese social e ao interese prioritario de establecer unha colaboración o máis estreita posible entre a Consellería de Emprego, Comercio e Emigración e o Clúster da Comunicación de Galicia, estímase xustificada a subscripción deste convenio, posto que o Clúster da Comunicación de Galicia conta con experiencia acreditada en diversos proxectos realizados e resulta un axente especialmente idóneo, ao tratarse da única entidade galega que representa a cadea de valor da comunicación en Galicia, integrada por distintos elementos: comunicación, marketing, publicidade, deseño, industria gráfica,.... Así mesmo, agrupa



empresas/entidades/persoas físicas que defende os intereses do sector da comunicación de Galicia e promove accións que impulsan a súa competitividade. Todo isto en aras a un mellor desenvolvemento da cultura emprendedora que se pretende levar a cabo dende o Centro de Orientación, Emprendemento, Acompañamento e Innovación para o Emprego de Galicia.

Con esta colaboración garántese un mellor cumprimento dos fins de ambas as dúas entidades en beneficio da cidadanía e da sociedade galega, xa que a promoción de iniciativas económicas e innovadoras, en especial no eido do emprendemento e da comunicación, resulta do interese das partes asinantes.

En virtude do anterior, e tendo en conta que o Clúster da Comunicación de Galicia cumpre cos requisitos establecidos para obter a condición de beneficiaria, segundo o artigo 10 da *Lei 9/2007, do 13 de xuño, de subvencións de Galicia*, as partes acordan subscribir o presente convenio de acordo coas seguintes

## CLÁUSULAS

### **Primeira. Obxecto do convenio**

O obxecto do convenio é establecer as condicións polas que se rexe a concesión dunha axuda por parte da Consellería de Emprego, Comercio e Emigración ao Clúster da Comunicación de Galicia, coa finalidade de financiar a prestación de servizos de marketing e comunicación a favor da comunidade emprendedora.

Ademais, o Clúster da Comunicación de Galicia realizará actividades de promoción e difusión da cultura emprendedora no ámbito da comunicación e na súa contorna, co fin de impulsar a creación de novas iniciativas e a xeración de emprego.

A través deste convenio, prestaranse servizos relacionados co impulso de negocios emprendedores de calquera sector a través do acceso a servizos profesionais de comunicación que axuden ás novas empresas á súa saída ao mercado, a conectar co seu público obxectivo e a crear marcas que aporten valor á súa clientela, potenciando así a



xeración de empresas máis fortes e sostibles.

## **Segunda. Actividades a desenvolver**

O Clúster da Comunicación de Galicia levará a cabo unha serie de actividades no ámbito da prestación de servizos de marketing e comunicación que van dirixidas a persoas emprendedoras. As actuacións son as seguintes:

### 1. Estratexia de comunicación Alento:

- Actualización da páxina web do programa Alento;
- Desenvolvemento dos contidos gráficos e materiais e soportes empregados na difusión do programa e no seu desenvolvemento;
- Definición da estratexia de comunicación e desenvolvemento da mesma;
- Difusión do programa e captación de candidatos, a través das accións publicitarias que sexan precisas e a través da comunicación coa Rede de Polos de emprendemento e apoio ao emprego, así como con outros organismos e entidades privadas;
- Xeración dos contidos a desenvolver ao abeiro do programa.

### 2. Xestión e coordinación de solicitudes do programa Alento:

- Definición dos servizos a prestar en virtude do convenio;
- Determinación de requisitos de acceso aos servizos de comunicación e marketing;
- Coordinación e xestión das solicitudes de participación recibidas.
- Coordinación operativa entre provedores e emprendedores.

### 3. Xornada de presentación pública do programa Alento.

4. Prestación de servizos de marketing e comunicación por parte das empresas/profesionais vinculados ao Clúster, nos seguintes ámbitos:

- Deseño da imaxe corporativa, da páxina web, do ecommerce, ...
- Servizos de marketing (análise e estratexia, investigación de mercado,...) e marketing dixital (estratexia e accións);
- Publicidade (estratexia creativa, asesoramento, servizos de impresión publicitaria, ...);
- Servizos de carácter audiovisual (vídeo marketing corporativo, promoción, ...);



- Comunicación.

## 5. Xornada de presentación dos resultados do programa Alento.

No Anexo I deste convenio determínase unha previsión do orzamento. Calquera modificación posterior deberá acordarse coa Dirección Xeral de Traballo Autónomo e Economía Social.

Todas as actuacións derivadas do presente convenio serán obxecto dunha programación previa cuxa configuración asumirá o Clúster da Comunicación de Galicia e que presentará ante a Dirección Xeral de Traballo Autónomo e Economía Social, indicando os contidos, lugares e datas de realización, etc, co obxecto da súa validación por parte desta Administración pública.

A Dirección Xeral de Traballo Autónomo e Economía Social -ben directamente, ben a través do COE de Galicia e/ou da Rede de Polos- participará activamente nas actividades e eventos que Clúster da Comunicación de Galicia realice no marco deste convenio.

### **Terceira. Compromisos das partes**

En virtude deste convenio de colaboración, as partes comprométense a desenvolver coordinadamente, no ámbito das súas respectivas competencias, as actuacións necesarias para o eficaz cumprimento do obxecto do convenio.

As accións previstas no convenio rexeranse polo programa recollido na cláusula anterior, que inclúe os servizos de comunicación e marketing dirixidos ao impulso de negocios emprendedores.

As partes se comprometen, ademais, a difundir o espírito innovador e emprendedor que inspira o presente convenio, nas súas páxinas web, redes sociais ou calquera outro medio de comunicación, así como a contribuir á xestión e supervisión durante o seu desenvolvemento.

#### 1. Compromisos do Clúster da Comunicación de Galicia:

- a) Difundir e promover o espírito emprendedor e innovador entre as persoas





empendedoras no ámbito da comunicación a través das actividades que se recollen na cláusula segunda.

b) Facer constar a financiación da Xunta de Galicia e da Consellería de Emprego, Comercio e Emigración na publicidade que se leve a cabo sobre as distintas actividades.

c) Asignar os medios persoais e materiais cos que conta e os que resulten necesarios para desenvolver o obxecto do convenio, ademais dos coñecementos e experiencia previa, para o deseño, organización e desenvolvemento das actuacións de apoio ao emprendemento, coa finalidade de trazar e executar un programa específico que teña como obxectivo desenvolver as actuacións concretadas na cláusula segunda. De ser preciso, poderá contratar as colaboracións externas que se precisen para a execución das actuacións establecidas neste convenio.

d) Achegar coa xustificación os informes e documentos que acrediten fidedignamente o desenvolvemento do obxecto do presente convenio, así como os informes e demais documentos requiridos pola Xunta de Galicia.

e) No desenvolvemento do programa obxecto deste convenio, o Clúster da Comunicación de Galicia comprométese a seguir as indicacións proporcionadas pola Dirección Xeral de Traballo Autónomo e Economía Social, ben directamente, ben a través do COE de Galicia.

f) O Clúster da Comunicación de Galicia comprométese a facer constar en toda presentación pública, así como en todo acto de difusión e publicidade que xeren as actividades obxecto deste convenio – ben sexa impresa, audiovisual ou a través de calquera outro soporte que utilice, incluído internet-, de xeito manifesto e claramente apreciable, a participación da Xunta de Galicia e da Consellería de Emprego, Comercio e Emigración, de acordo co Manual de identidade corporativa da Xunta de Galicia e atendendo ás instrucións que esta lle comunique en cada momento.



2. Compromisos da Consellería de Emprego, Comercio e Emigración: a Consellería participará co financiamento dos gastos derivados deste convenio, de conformidade co establecido na cláusula cuarta.

#### **Cuarta. Financiamento e gastos subvencionables**

A Consellería de Emprego, Comercio e Emigración achegará a cantidade total de cento vinte mil euros (120.000,00 €) con cargo á aplicación orzamentaria 14.04.322C.481.1 (código de proxecto 2023 00113) dos orzamentos da Comunidade Autónoma, aprobados pola *Lei 4/2024, do 27 de decembro, de orzamentos xerais da Comunidade Autónoma de Galicia para o ano 2025*.

A achega económica da Consellería destinarase exclusivamente a cubrir os custos xerados desde o 01/01/2025 ata o 01/12/2025 que sexan precisos para a execución e cumprimento do obxecto do convenio.

De acordo co disposto no artigo 29.1 da *Lei 9/2007, do 13 de xuño, de subvencións de Galicia*, consideraranse subvencionables os gastos que, de xeito indubidable, respondan á natureza da actividade subvencionada e se realicen no prazo establecido.

En ningún caso os custes superarán o valor de mercado.

Ao abeiro deste convenio, considéranse gastos subvencionables os realizados entre o 01/01/2025 e o 01/12/2025 que, sen admitir dúbida, respondan á natureza das actividades que está previsto desenvolver e especificadas na cláusula segunda, entre os que se atopan os seguintes:

- Gastos de persoal.

Son gastos de persoal a retribución á persoa traballadora, os impostos directos e as cotizacións á Seguridade Social.



Consideraranse custes directos subvencionables ao abeiro deste convenio os gastos do persoal traballador que desempeñe un papel directo no desenvolvemento das actividades recollidas neste convenio.

Tamén terá a consideración de custe directo o gasto do persoal que interveña na execución das actividades do convenio, planificando actuacións, executando ou controlando as actividades operativas, prestando servizos aos/ás destinatarios/as finais, etc.

No caso de que se imputen gastos relativos a persoal que desenvolva as súas funcións en varios proxectos e/ou actividades, o Clúster da Comunicación de Galicia deberá especificar as tarefas realizadas e o tempo dedicado a estas, así como o criterio para a súa correcta imputación ao convenio, e proporcionará evidencias relativas á dedicación efectiva.

Se contemplarán como custes indirectos os gastos relativos ao persoal do Clúster que simplemente desempeñe un papel de apoio respecto da execución deste convenio (v.gr. funcións directivas, contables, apoio en materia de contratación, xestión de recursos humanos, tecnoloxía, labores administrativas, etc.).

No que atinxe ás indemnizacións por razóns de servizo derivadas de gastos de desprazamento ou transporte e das dietas de aloxamento e manutención, serán subvencionables as xeradas polo persoal do Clúster que estea adscrito ás actividades encadradas no ámbito deste convenio e respecto das cales os seus gastos sexan subvencionables como custes directos. Só en casos excepcionais e debidamente xustificados admitiranse os referidos gastos respecto do persoal do Clúster que desempeñe un papel de apoio.

Os gastos por desprazamento e transporte e por dietas de aloxamento e manutención estarán suficientemente motivados na necesidade de realizar as actividades obxecto do convenio e, en todo caso, deberán estar autorizados pola persoa responsable do Clúster da Comunicación de Galicia.

Os gastos de transporte serán subvencionables sobre a base dos custes realmente soportados e xustificados, tendo en conta a forma máis económica de desprazamento. Nos



casos en que se utilice un vehículo privado, o importe relativo á quilometraxe calcularase de acordo coa contía prevista na normativa vixente en materia de indemnizacións por razón de servizo para o persoal con destino na Administración da Comunidade Autónoma de Galicia.

Os gastos por desprazamento e transporte e por dietas de aloxamento e manutención que se imputen a este convenio non poderán superar, no seu conxunto, o 3% do importe total previsto no mesmo.

- Gastos derivados de servizos profesionais relativos ás actividades obxecto deste convenio, así como os gastos de coordinación, xestión e estrutura necesarios para a preparación e execución das ditas actividades. Estes gastos serán subvencionables sempre que sexan determinados ou determinables e directamente relacionados coa realización das ditas actividades.

- Gastos de aluguer e gastos de acondicionamento dos espazos para o desenvolvemento das actividades previstas neste convenio que así o precisen, sempre que sexan determinados ou determinables e estritamente necesarios para a súa execución.

- Gastos en material funxible, artigos de consumo, subministracións e servizos, complementarios das concretas actividades (cátering, material didáctico, medios de apoio, publicidade, ...). Estes gastos serán subvencionables sempre que sexan determinados ou determinables e necesarios para a execución das actividades previstas neste convenio.

- Custes indirectos.

Para os efectos deste convenio, entenderase por custes indirectos os derivados daqueles gastos que, sen manter unha relación directa coa execución das concretas actividades que nel se prevén, no entanto, considéranse imprescindibles para a súa correcta preparación e execución (entre outros, gastos financeiros, de asesoramento, de xestión, gastos en subministracións de luz, teléfono, internet, ...). Tamén terán a consideración de custes indirectos os referidos no apartado relativo aos gastos de persoal.

Para a financiación dos custes indirectos aplicables ao obxecto deste convenio fíxase unha



porcentaxe a tanto alzado do 10 % sobre os custos directos elixibles.

En relación cos tributos e de acordo co artigo 29.8 da Lei 9/2007, do 13 de xuño, estes son gasto subvencionable cando a persoa beneficiaria da subvención os aboa efectivamente. En ningún caso considéranse gastos subvencionables os impostos indirectos cando sexan susceptibles de recuperación ou compensación nin os impostos persoais sobre a renda.

O Clúster da Comunicación de Galicia realiza unha estimación dos gastos ao abeiro deste convenio, desagregados por actuacións, tal e como se recolle no Anexo I deste documento.

Poderán modificarse as partidas das diferentes actividades recollidas no anexo I ata un 10% da cantidade total do convenio.

#### **Quinta. Xustificación e pagamento**

O Clúster da Comunicación de Galicia deberá remitir á Dirección Xeral de Traballo Autónomo e Economía Social, ata o 02/12/2025, toda a documentación xustificativa da actividade desenvolvida e dos gastos realizados e pagados. A presentación da dita documentación realizarase por vía telemática, de acordo co artigo 14 da *Lei 39/2015, do 1 de outubro, do procedemento administrativo común das Administracións Públicas*.

O Clúster xustificará a totalidade da contribución efectuada pola Consellería de Emprego, Comercio e Emigración, mediante a seguinte documentación:

a) Certificación expedida pola persoa responsable do Clúster na que se declare ter dado debido cumprimento á finalidade do convenio suscrito, coa aplicación dos fondos destinados a tal efecto.

b) Memoria de actuación xustificativa do cumprimento do convenio, con indicación das concretas actividades realizadas, o número de persoas participantes en cada unha (desagregado, como mínimo, por sexo e idade) e os resultados obtidos. Nesta memoria incluíranse evidencias do traballo desenvolvido. A memoria remitirase tamén en formato editable.



- c) Memoria económica xustificativa do custo das actividades realizadas, que conterà:
- Unha certificación expedida pola persoa responsable do Clúster na que figure a relación clasificada dos gastos realizados, consonte o modelo que, de xeito orientativo, se recolle no Anexo II deste convenio. Remitirase tamén en formato editable.
  - As facturas ou documentos de valor probatorio equivalente no tráfico xurídico mercantil ou con eficacia administrativa incorporados á relación á que se fai referencia no parágrafo anterior. No caso de non achegarse os documentos orixinais, acompañarase unha declaración asinada indicando que estes atópanse en poder do Clúster.
  - A documentación acreditativa do pagamento efectuado, consistente en xustificante de transferencia ou certificación bancaria, debendo figurar claramente identificados o/a emisor/a e o/a receptor/a do pagamento. Non se admiten os pagos en efectivo.
  - A documentación acreditativa dos gastos realizados con medios ou recursos propios.
  - En relación cos gastos de persoal, deberán achegar a seguinte documentación:
    - i. Unha relación do persoal que se adscriba á realización das actividades realizadas en virtude do convenio, na que se indicarán as funcións efectuadas, o tempo de dedicación e o custe imputado.
    - ii. As nóminas, os recibos mensuais de liquidacións de cotizacións da Tesourería Xeral da Seguridade Social, RLC e RNT, así como os xustificantes de pagamento dos salarios e dos impostos e cargas sociais; todo isto referido ao período de vixencia do convenio e en relación cos traballadores/as de cuxos custos solicitan aboamento ao amparo deste convenio.
    - iii. Con respecto aos gastos de desprazamento ou transporte e ás dietas de aloxamento e manutención, deberán presentarse, segundo corresponda, as correspondentes follas de liquidación, facturas dos gastos e xustificantes de aboamento.
- d) Declaración na que figure unha relación detallada doutras axudas, ingresos ou recursos percibidos, procedentes de calquera institución, organismo ou entidade, pública ou privada,



nacional, da Unión Europea ou internacional, para financiar as actuacións previstas no convenio. Deberá constar a procedencia e o importe.

En caso contrario, deberán achegar declaración responsable de non ter percibido ningún ingreso aos mesmos efectos.

No caso de que a subvención concedida supere, illadamente ou en concorrencia con outras, o custo da actividade para a que foi concedida a subvención, descontarase o exceso obtido sobre o citado custo.

e) Certificacións acreditativas de estar ao día no cumprimento das obrigas fronte á Axencia Estatal de Administración Tributaria, á Axencia Tributaria de Galicia e á Tesourería Xeral da Seguridade Social, todas aos efectos de ser beneficiaria de subvencións.

f) Declaración responsable de non ter ningunha débeda coa Administración pública da Comunidade autónoma de Galicia.

g) Declaración responsable de non incursión en ningunha das prohibicións de obter a condición de beneficiaria de subvencións, de acordo co establecido na lexislación.

h) Declaración responsable sobre a situación/condición do Clúster da Comunicación de Galicia con respecto ao IVE.

A Dirección Xeral de Traballo Autónomo e Economía Social resérvase o dereito a solicitar toda a documentación que considere precisa para acreditar o cumprimento do obxecto deste convenio.

Unha vez que o persoal das unidades dependentes da Dirección Xeral de Traballo Autónomo e Economía Social constate a efectiva realización das actuacións previstas no convenio de acordo coa súa finalidade, e despois de revisar a documentación xustificativa dos gastos imputados, expedirase un informe da verificación realizada. A continuación, tramitarase o pagamento polo importe debidamente xustificado que corresponda a gastos elixibles conforme ao presente convenio.



Para o suposto de que os gastos que se xustifiquen fosen inferiores ao financiamento estipulado na cláusula cuarta e sempre que se cumpra coa finalidade prevista, procederá o pagamento na contía que sexa obxecto de xustificación.

Poderanse realizar pagamentos parciais por un importe de ata o 80% do importe do convenio de acordo co disposto no artigo 31.6 da Lei 9/2007 de subvencións de Galicia e no 62 do seu Regulamento, que poderán supoñer a realización de pagamentos fraccionados que responderán ao ritmo da execución das accións subvencionadas, aboándose por contía equivalente á xustificación presentada.

Segundo o recollido no artigo 65.4.f) do Regulamento da Lei de Subvencións de Galicia e en relación co preceptuado nos seus artigos 62.3 e 67, o Clúster queda exonerado da constitución de garantía.

#### **Sexta. Obrigas da beneficiaria da subvención**

Ao abeiro do presente convenio, o Clúster da Comunicación de Galicia asume, entre outras, as seguintes obrigas:

- Desenvolver as actuacións recollidas na cláusula segunda, en virtude das que se desenvolve o obxecto deste convenio, e xustificar a súa realización e o cumprimento da finalidade prevista sen percibir ningunha remuneración por parte das persoas usuarias do programa.
- Realizar a divulgación das actuacións segundo as instrucións que determine a Dirección Xeral de Traballo Autónomo e Economía Social Social -ben directamente, ben a través do COE de Galicia e/ou da Rede de Polos- e facer constar expresamente en toda publicidade, acto de difusión e presentación pública os logotipos da Xunta de Galicia e da Consellería de Emprego, Comercio e Emigración, consonte o recollido na cláusula terceira deste convenio e, en todo caso, atendendo ás directrices que esta Administración traslade en cada caso.
- Ser titular e suxeito pasivo de todas as obrigas tributarias á Administración, derivadas das accións realizadas en execución do convenio, que impliquen o pagamento de impostos, cotas e retencións.



- Atender as medidas de xestión e coordinación que dispoña a Dirección Xeral de Traballo Autónomo e Economía Social Social -ben directamente, ben a través do COE de Galicia e/ou da Rede de Polos. Tamén deberá responder ás peticións de información e demais demandas que esta solicite sobre calquera aspecto ou elemento comprendido no obxecto deste convenio.
- Someterse ás actuacións de control, comprobación e inspección que efectuará a Consellería de Emprego, Comercio e Emigración.
- Facilitar toda a información que lle sexa requirida pola Intervención Xeral da Comunidade Autónoma, o Tribunal de Contas e o Consello de Contas, no exercicio das súas funcións de fiscalización e control do destino das subvencións.
- Reintegrar a contía percibida no caso de incumprimento das condicións establecidas no convenio para a súa percepción.
- Tratar dun xeito confidencial toda a información coñecida e datos recibidos directa ou indirectamente en relación co obxecto deste convenio, quedando prohibida a súa revelación, así como o seu uso para outra finalidade sen o consentimento previo da Consellería de Emprego, Comercio e Emigración.
- Conservar a documentación xustificativa da aplicación dos fondos percibidos durante un período de 5 anos.
- Poñer en coñecemento desta Administración a obtención doutras axudas, ingresos ou recursos, procedentes de calquera institución, organismo ou entidade, pública ou privada, nacional, da Unión Europea ou internacional, para financiar as actuacións previstas no convenio. Con carácter xeral, a axuda recollida neste convenio será compatible con outras que se obteñan para a mesma finalidade, sempre e cando non se incorra en dobre financiamento e quede nitidamente identificada a trazabilidade dos gastos. A obtención concorrente doutras axudas, ingresos ou recursos, poderá dar lugar á modificación da contía contemplada no presente convenio.



- Poñer en coñecemento desta Administración calquera circunstancia que modifique as condicións que fundamentaron a concesión desta axuda.
- En virtude do disposto no artigo 4.3 da *Lei 1/2016, do 18 de xaneiro, de transparencia e bo goberno*, subministrar a esta Administración, previo requirimento, toda a información necesaria para o cumprimento das obrigas previstas no Título I da dita lei por parte da Consellería de Emprego, Comercio e Emigración.
- No tocante ás medidas contra a fraude, a corrupción e o conflito de intereses, cómpre facer referencia á canle autonómica de denuncias (<https://transparencia.xunta.gal/canle-denuncias>), ao *Plan xeral de prevención de riscos de xestión e medidas antifraude da Xunta de Galicia* ([https://ficheiros-web.xunta.gal/transparencia/codigo-etico/plan-prevencion-riscos-medidas-antifraude\\_gal.pdf](https://ficheiros-web.xunta.gal/transparencia/codigo-etico/plan-prevencion-riscos-medidas-antifraude_gal.pdf)), ao *Plan de prevención de riscos de xestión e medidas antifraude da Consellería de Emprego, Comercio e Emigración* e aos Plans específicos de prevención de riscos de xestión e medidas antifraude de cada un dos órganos que configuran a Consellería (<https://transparencia.xunta.gal/integridade-institucional/plans-antifraude>). As devanditas medidas se aplican de modo expreso a este convenio.
- As demais obrigas previstas na lexislación vixente.

### **Sétima. Disponibilidade dos resultados e conclusións das actuacións realizadas**

O diversos datos, análises, estudos estatísticos e participativos e as conclusións e determinacións resultantes en desenvolvemento das actuacións previstas no convenio de colaboración, serán de uso e titularidade común das partes asinantes.

Así mesmo, calquera dereito de propiedade industrial e intelectual sobre o material que resulte das actuacións do presente convenio será de titularidade conxunta das partes asinantes, de xeito que ningunha poida facer uso dos citados dereitos coa oposición dunha das asinantes.

Calquera modificación deberá ser autorizada polas partes asinantes, non obstante a Consellería, no cumprimento dos seus fins institucionais, poderá utilizar libre e



gratuitamente os traballos de campo, datos de todo tipo, resultados, análises, informes e conclusións que se deriven das actuacións obxecto do convenio.

En todo caso, nas accións de difusión de datos e informes obtidos pola execución destas accións, farase sempre referencia ao convenio de colaboración suscrito entre ambas as dúas partes.

### **Oitava. Inexistencia de relación laboral**

A formalización e execución do presente convenio non implicará ningunha relación de carácter laboral nin de calquera outra natureza entre a Consellería de Emprego, Comercio e Emigración ou calquera organismo ou entidade dependente ou vinculada á mesma, cos/coas profesionais e demais persoas que participen nas accións que constitúen o obxecto deste convenio, de tal xeito que, por este motivo, non se lle poderá esixir a esta Administración ningunha responsabilidade directa nin subsidiaria por actos ou feitos acaecidos no desenvolvemento do seu obxecto.

### **Novena. Modificación e resolución do convenio**

Toda alteración das condicións tidas en conta para a concesión da axuda instrumentalizada no presente convenio poderá dar lugar á súa modificación, sendo de aplicación as previsións contidas na *Lei 9/2007, de 13 de xuño, de subvencións de Galicia* e no Decreto 11/2009, do 8 de xaneiro, polo que se aproba o seu regulamento.

Así mesmo, cómpre estar ao disposto no artigo 31.4 da *Lei 14/2013, do 26 de decembro, de racionalización do sector público autonómico*, que establece que os convenios suscritos pola Administración xeral da Comunidade Autónoma e as entidades instrumentais do sector público autonómico poderán ser obxecto de modificación cando teñan como finalidade o logro dos obxectivos de estabilidade orzamentaria e sostibilidade financeira. Ditas modificacións terán por obxecto a redución do volume das obrigacións ou a ampliación do seu prazo de execución.

A obtención doutras axudas, ingresos ou recursos, procedentes de calquera institución,



organismo ou entidade, pública ou privada, nacional, da Unión Europea ou internacional, para financiar as actuacións previstas neste convenio poderá dar lugar á modificación da contía contemplada na cláusula cuarta.

Son causas de resolución deste convenio as seguintes:

- O transcurso do prazo de vixencia do convenio sen terse acordado a súa prórroga.
- O acordo unánime das partes asinantes.
- O incumprimento das obrigas e compromisos asumidos por algunha das partes asinantes.
- A decisión xudicial declarativa da nulidade do convenio.

Consonte o disposto no artigo 31.5 da Lei 9/2007, do 13 de xuño, producirase a perda do dereito ao cobro ou, no seu caso, a obriga de reintegro da contía xa percibida no caso de falta de xustificación ou de concorrencia dalgunha das causas previstas no artigo 33 da citada lei. O reintegro realizarase ao Tesouro da Xunta de Galicia, incluíndo os xuros a que dea lugar, de conformidade coa normativa autonómica de aplicación e nos prazos máis perentorios que esta prevé.

### **Décima. Comisión de seguimento**

Para o debido seguimento do convenio e da súa execución prevese a existencia dunha Comisión de seguimento que estará integrada, por parte da Consellería de Emprego, Comercio e Emigración, por dúas persoas representantes da Dirección Xeral de Traballo Autónomo e Economía Social; en representación do Clúster da Comunicación de Galicia, integrarán a comisión as dúas persoas que esta designe. A Comisión de seguimento reunirse a petición dunha das partes ou de ambas.

A actuación da Comisión de seguimento abranguerá a constatación da implantación e efectiva aplicación do previsto no convenio, a solución das controversias suscitadas na interpretación e cumprimento do mesmo, así como a proposta dunha posible revisión, modificación, adecuación ou actualización das súas cláusulas.

A actuación da Comisión de seguimento axustarase ao establecido nos preceptos básicos da *Lei 40/2015, do 1 de outubro, de réxime xurídico do sector público* e na *Lei 16/2010, de 17*



*decembro, de organización e funcionamento da Administración xeral e do sector público autonómico de Galicia.*

### **Décimo primeira. Natureza, réxime xurídico e xurisdición competente**

Este convenio ten natureza administrativa, rexéndose polo establecido nas súas propias cláusulas e polo disposto nas seguintes normas xurídicas:

- *Lei 9/2007, do 13 de xuño, de subvencións de Galicia;*
- *Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia;*
- *Lei 38/2003, do 17 de novembro, Xeral de Subvencións;*
- *Real decreto 887/2006, do 21 de xullo, polo que se aproba o Regulamento da Lei 38/2003, do 17 de novembro, Xeral de Subvencións;*
- *Lei 16/2010, do 17 de decembro, de organización e funcionamento da Administración xeral e do sector público autonómico de Galicia;*
- *Lei 1/2016, de 18 de xaneiro, de transparencia e bo goberno;*
- *Lei 40/2015, do 1 de outubro, de réxime xurídico do sector público;*
- *Lei 39/2015, do 1 de outubro, do procedemento administrativo común das Administracións Públicas;*
- As demais normas que resulten aplicables.

O obxecto deste convenio non se atopa comprendido en ningún dos contratos regulados pola *Lei 9/2017, do 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, de conformidade co establecido no seu artigo 6.*

As dúbidas e controversias derivadas da aplicación, interpretación, modificación, resolución, reintegro e nulidade do presente convenio serán resoltas, en última instancia, pola persoa titular da Consellería de Emprego, Comercio e Emigración, cuxos acordos porán fin á vía administrativa e serán inmediatamente executivos, sendo impugnables ante a xurisdición contencioso-administrativa, de acordo co disposto na *Lei 29/1998, do 13 de xullo, reguladora da xurisdición Contencioso-administrativa.*



## Décimo segunda. Publicidade e rexistro

As partes asinantes deste convenio outorgan o seu consentimento expreso para que os datos persoais e as demais especificacións que constan no mesmo sexan publicados no Portal de Transparencia e Goberno Aberto e no Rexistro de Convenios da Xunta de Galicia, de acordo co establecido na *Lei 1/2016, do 18 de xaneiro, de transparencia e bo goberno*, no *Decreto 126/2006, do 20 de xullo, polo que se regula o Rexistro de Convenios da Xunta de Galicia* e na *Lei 19/2013, do 9 de decembro, de transparencia, acceso á información pública e bo goberno*.

A información relativa ao presente convenio comunicarase á Base de Datos Nacional de Subvencións (BDNS), consonte o preceptuado na *Lei 38/2003, do 17 de novembro, Xeral de Subvencións*.

## Décimo terceira. Autorizacións e protección de datos de carácter persoal

As partes asinantes obríganse ao cumprimento do *Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos)*, da *Lei Orgánica 3/2018, do 5 de decembro, de protección de datos persoais e garantía dos dereitos dixitais*, do *Real Decreto 1720/2007, do 21 de decembro, polo que se aproba o Regulamento de desenvolvemento da Lei Orgánica 15/1999, do 13 de decembro, de protección de datos de carácter persoal* e demais normativa vixente en cada momento, de aplicación en materia de protección de datos.

Ademais, o Clúster da Comunicación de Galicia autoriza á Consellería de Emprego, Comercio e Emigración a obter, de forma directa, a través de certificados telemáticos, a acreditación do cumprimento das súas obrigas coa Tesourería Xeral da Seguridade Social, coa Axencia Estatal de Administración Tributaria e coa consellería competente en materia de Facenda da



Xunta de Galicia e organismos ou entidades dependentes ou vinculadas á mesma.

#### **Décimo cuarta. Vixencia**

O presente convenio entrará en vigor na data da súa sinatura, finalizando a súa vixencia o 31/12/2025.

En calquera momento anterior ao período establecido no parágrafo anterior e de acordo coa lexislación aplicable, ambas partes poderán acordar a súa prórroga.

E, en proba de conformidade cos termos do convenio, as partes comparecentes o asinan en Santiago de Compostela, na data da sinatura electrónica.

O conselleiro de Emprego,  
Comercio e Emigración

José González Vázquez

O presidente do Clúster  
da Comunicación de Galicia

Alberto Garnil Rodríguez



**ANEXO I**

Tipoloxía da Actuación (actividades a realizar)	Tipoloxía de gasto subvencionable	Importe ano 2025	TOTAL
<p><b>1. Comunicación Programa Alento</b></p> <p>1.1. Web Alento. Deseno Gráfico</p> <ul style="list-style-type: none"> <li>-Actualización web Programa Alento.</li> <li>-Desenvolvemento dos contidos gráficos para os materiais e soportes empregados na difusión do programa desta edición.</li> </ul> <p>1.2 Estratexia e difusión.</p> <ul style="list-style-type: none"> <li>- Gabinete de comunicación. Definición de estratexia e desenvolvemento da mesma durante o período de execución do convenio.</li> <li>- Contacto cos Polo de Emprendemento así como con outros organismos e entidades privadas para a difusión do programa e captación de candidatos.</li> <li>- Materiais de difusión (online/offline) que se poidan precisar.</li> <li>- Memoria resumo do programa. Xeración de contido.</li> <li>- Publicidade precisa para difusión do Programa Alento.</li> </ul>	Gastos de persoal:	720,87€	
	Subministracións (servizos de comunicación prestados por empresas proveedoras):	7.283,21€	
	Outros (especificar):		
	Gastos de persoal:	1.507,66€	





<p><b>2.Xestión e coordinación das solicitudes do Programa Alento</b></p> <p>-Revisión dos requisitos de acceso os servizos de comunicación en colaboración ca Dirección Xeral de Traballo Autónomo e Polos de Emprendemento.</p> <p>-Axustes/revisión das características dos servizos do Programa Alento.</p> <p>-Coordinación e xestión das solicitudes recibidas por parte da comunicade emprendedora en colaboración cos Polos de Emprendemento.</p> <p>-Coordinación operativa entre provedores e emprendedores.</p>	Subministración (servizos prestados por empresas proveedoras):		
	Outros (especificar):		
<p><b>3. Xornada/eventos presentación do Programa Alento 2025</b></p> <p>-Evento/Xornada de presentación pública do programa Alento 2025 con fin de presentar os obxectivos e beneficios desta nova edición e captar a atención de prescriptores e público obxectivo.</p>	Gastos de personal:	411,93€	
	Subministración (servizos prestados por empresas proveedoras):	3.098,65€	
	Subministración (servizos prestados por empresas proveedoras):		
<p><b>4. Prestación de servizos Alento</b></p> <p>Prestacións dos servizos Alento á comunidade emprendedora por parte das empresas/profesionais vinculadas</p>	Gastos de persoal		
	Subministracións (Servizos prestados polas empresas de comunicación e márketing colaboradoras no proxecto):	103.004,70€	



<p>ó Clúster da Comunicación vinculados algúns dos seguintes eixos: deseno márketing, publicidade, comunicación, impresión, audiovisual.</p> <p>O valor de mercado de cada servizo irá desde 2.000€ ata 4.500€.</p>	Outros:		
<p><b>5.Presentación resultados do proxecto</b></p> <p>Xornada/evento de presentación dos resultados finais obtidos tras o desenvolvemento do programa.</p>	Gastos de persoal:	411,93€	
	Subministracións (servizos prestados polas empresas proveedoras):	3.561,05€	
	Outros:		
<b>TOTAIS</b>	<b>Gastos de persoal (*)</b>	<b>3.052,39€</b>	<b>120.000,00 €</b>
	Servizos	<b>116.947,61€</b>	
	Outros		



## ANEXO II

### CERTIFICACIÓN E RELACIÓN DE GASTOS REALIZADOS

D/D<sup>a</sup>. \*\*\*\*\* , con DNI \*\*\*\*\* , en calidade de \*\*\*\*\* do Clúster da Comunicación de Galicia, ao obxecto de dar cumprimento ao establecido no *Convenio de colaboración entre a Consellería de Emprego, Comercio e Emigración e o Clúster da Comunicación de Galicia para a prestación de servizos de marketing e comunicación á comunidade emprendedora, integrados no Programa anual de actividades do Centro de Orientación, Emprendemento, Acompañamento e Innovación para o Emprego da Comunidade autónoma de Galicia*, certifica que os gastos realizados para o fin previsto ascenden a \*\*\*\*\* €, coa seguinte concreción:

A. GASTOS PERSOAL												
Traballador/a	NIF	Concepto	Función *	Mes	Salario bruto	S.S. a cargo do/a traballador/a	IRPF	Salario líquido	S.S. a cargo da empresa	Custe laboral	% Imputación	Importe imputado
											<b>TOTAL A</b>	

\* Función desempeñada de entre os cinco grupos de actividades definidos na cláusula segunda



B. GASTOS ACTIVIDADE											
Nº/Ref. documento	Provedor/a	NIF	Concepto	Data emisión	Data pagamento	Base imponible	IVE	IRPF	Importe total	% Imputación	Importe imputado
										<b>TOTAL B</b>	

C. GASTOS DESPRAZAMENTO/TRANSPORTE, DIETAS										
Nº/Ref. documento*	Provedor/a	Traballador/a	Concepto	Data realización gasto	Data emisión	Data pagamento	Importe total **	% Imputación	Importe imputado	
									<b>TOTAL C</b>	

\* Documento: factura, formulario de gastos, ...

\*\* Importe total que reflicte o documento. No caso de factura, incluirá o IVE dependendo da situación/condición do Clúster respecto deste imposto



<b>D. CUSTES INDIRECTOS</b>	
<b>A. GASTOS PERSOAL</b>	
<b>B. GASTOS ACTIVIDADE</b>	
<b>C. GASTOS DESPRAZAMENTO/ TRANSPORTE, DIETAS</b>	
<b>TOTAL</b>	
<b>CUSTES INDIRECTOS IMPUTADOS (10 % de A + B +C)</b>	

